



ル 6
2529
45



門名
號2529
卷49-45

吉林通志卷一百十六

人物志四十五 列女

塔思泰妻

巴彥達哩妻舒穆魯氏

雅克舒妻吳氏

同格妻阿蘇氏

邱福德妻瓜爾佳氏

閔安泰妻喻氏

凌柱妻赫舍里氏

伊達色妻郭氏

德得妻姚氏

訥伊松額妻顏札氏

倭克精阿妻吳氏

阿爾京阿妻關氏

任九富女弟小俊

貴昌妻楊郎氏

赫舍里氏富陞女

李本業聘妻張氏

徐立中妻馮氏

梁文達妻陳氏

張氏

郝化芳妻王氏

于占鼇妻張氏

賈人某妻劉氏

劉銖妻樂氏

李汝斌妻張氏

馮應魁妻盧氏

張卓妻安氏

郭同生聘妻紀氏

衣尙志妻姜氏

劉珍聘妻任氏

劉氏袁氏張氏

朱氏子妻子氏

于九如妻張氏

楊維清妻馬氏

金廣年妻蓋氏

秦繼宗妻李氏

劉芝妻某氏

靳繩祖妻席氏

魏清妻傅氏

孤景增妻楊氏

王清山妻袁氏

李殿寵聘妻孫氏

李彥亮妻張氏

王瑞琳妻劉氏

郭其昶妻徐氏

王振翰妻張氏

王連沅聘妻李氏

霍氏女

王氏子聘妻梁氏

朱貞修妻子氏

董秀姐

徐景秋妻劉氏

吳廣信妻沈氏

于乃軾妻張氏

王作正妻劉氏

趙氏子聘妻吳氏

吳某妻高氏

吳氏女

王氏子聘妻李氏

伊爾根覺羅氏吉林烏拉正白旗塔思泰妻塔思泰
沒自計欲從死則襁褓中兒亡人血食所係欲留撫
之則年少而美恐無以自完也於是斷髮毀容屏處
一室子長納婦始出而受拜前此雖親串莫之面焉
乾隆十六年

予旌

舒穆魯氏歸吉林烏拉正黃旗巴彥達哩以賢孝稱
巴彥達哩將沒日以老母稚子爲累矣對曰所不卽
與君偕亦職是故相持痛哭者久之旣而事親撫孤

動中禮法乾隆十七年

予旌

吳氏歸三姓正藍旗披甲雅克舒土豪馮仁豔之久
覲隙欲污焉大罵以拒氣竭聲漸卒以不辱爲所害
乾隆十九年

予旌

阿蘇氏吉林烏拉正紅旗前鋒同格妻也同格之沒
家無餘貲蹙然曰未亡人已矣顧親在旨甘不具可
乎由是早夜作苦資以爲養知者難之乾隆二十二
年

子旌

瓜爾佳氏歸琿春正白旗卹福德二年生子而寡舅姑既先亡矣家又貧父母憐之規奪其志則泣訴於夫之從父憫而膳焉父母往視強以歸既有所聞中夜冒風雪抱其孤走數十里至從父家從父曰卹福德不死矣子長授室有孫瑚松阿官侍衛逮養若而年年九十六乃卒

喻氏歸吉林鑲白旗閔安泰家貧姑老他無期親而閔安泰沒用縫紉浣濯爲養姑安之既沒營斂若葬皆積年約口腹所儲者族人敬其賢孝以再從子閔

瑞芳嗣納婦生孫知者曰閔安泰之弗墜厥祀也尸之未亡人

赫舍里氏歸琿春鑲黃旗凌柱甫三月凌柱沒室中哭者咸曰天乎若少婦何哭應之曰彼天故能斬我耶其夜遂自縊

郭氏吉林烏拉正黃旗伊達色妻有趙官濟者窺其獨處冒入將犯之倉卒無可呼援力擱其面墜齒官濟負痛且怒遂害之乾隆二十二年

予旌入祀節孝祠

姚氏字吉林正藍旗德得年二十九未婚而德得沒

姚氏聞之曰女從一者也且有父母之命媒妁之言
遂衰服歸婚家以老乾隆二十九年

予旌

顏札氏知書明大義許繼璋春正黃旗侍衛訥伊松
額室而訥伊松額以領隊大臣從征金川以殉疆場
一日顏札氏夢有浴血立燈下者叱問爲誰曰訥伊
松額也悸而醒以語母氏母曰何作此不祥語而訥
以是日至哭請於父母曰夫其靈馳萬里要兒矣兒
不忍負之也父母從其志衰經往拜主留不復歸時
年十九撫前妻子多倫保有恩義多倫保亦以孝稱

歷官協領嘉慶三年

予旌

吳氏生員德麟之女字吉林正藍旗倭克精阿倭克
精阿沒訃至毀容絕粒父母譬之泣曰兒非往爲喪
主誓不生矣遂輿往親爲之斂然後成服數日不勝
哀而沒旌年未詳

關氏歸吉林委官阿爾京阿咸豐十一年從征戰沒
羅山縣吉林馬隊名天下而出殉疆場忠骸多不歸
或牌係辮髮橐載以車驛致數千里外以昇其家蓋
天下至酷也關氏檢遺衣招魂以葬而家無長物舍

悲茹苦撫子博祿十數年襲阿爾京阿雲騎尉世職
納婦何生孫英奎而博祿英奎相繼沒何氏嗣族子
英敏奉姑關氏以守蓋關氏之摧心可想而何氏之
矢志彌難矣姑婦並

救封宜人且以節婦旌而領催慶順披甲雙福青順亦從
征戰沒慶順妻吳氏雙福妻張祖氏青順妻丁氏並
守節待旌此外旗籍待旌者吉林則富平阿妻瓜勒
佳氏德豐阿妻孟氏庫金阿妻張氏貴壽妻傅氏殷
凱妻楊氏俄莫和蘇羅則英德妻何氏伯都訥則凌
德妻胡西哈拉氏百順妻扎胡哩氏常明妻塔齊勒

氏胡成妻博勒吉特氏永福妻瓜勒佳氏和春妻札
斯胡哩氏伊通則雙喜妻關劉氏海保妻孫劉氏岳
松阿妻于齊氏常海妻關金氏常順妻劉薛氏夫
國家不惜一二字之褒以曲慰天下究之數十年苦節
能貞亦豈爲茲綽楔而一邑一鄉舉者輒累牘未舉
者不知幾何也嗚呼

任小俊三姓崇庫爾站丁九富女弟流人高某調姦
不從出白刃脅之拒益厲與母王及九富並爲所戕
光緒十三年

予旌

國家有三尺法付有司使之禁暴乃法所不及至使弱女子以死自衛謂之何哉

楊郎氏歸三姓附學生貴昌事翁姑以孝聞亡何貴昌病沒治喪事唯謹然不甚哀翁姑固意其有死心矣繩絳一切皆密屏之一日拜貴昌之靈喁喁若有語起拜翁姑且拜且視淚如雨下曰兒衣慎勿易哽不成聲矣遂反其室翁知有異令姑趨視則鉛粉狼藉已倚枕而沒所衣蓋衰麻也時光緒十有八年赫舍里氏拉林口口旗

盛京副都統富陞女也父疾亟禱神願身代且刲臂和

藥以進亡何疾瘳女則憊甚矣創發因以沒豈神果

許之耶

以上八旗

張氏吉林誠信社人字李本業本業沒訃至匿不使知張氏聞於弟慮有他卽絞髮要父母趨婿家哭奠柩前自誓年二十一嘉慶四年

予旌

馮氏咸豐二年歸吉林尙禮社徐立中越九年立中沒無出舅姑老矣心憂婦去而他時無覆以一抔孤其麥飯之望馮氏旣窺其意私痛於中又不忍指天日自矢觸二老悲惟益謹所以事之人有恆言曰節

孝馮氏其然

陳氏字吉林永智社梁文達文達之沒泣請父母歸梁氏族人趨之遴子姓之秀者以爲嗣曰是宜有後也

張氏吉林居仁社人歸王春芳故無行數規之不聽一日負博進無以償或曰渠有婦在何患春芳心動歸盛言倡家之樂張氏曰已無行而並將辱我耶趣之出仰藥死聞者哀之

王氏歸吉林居仁社庖人子祁化芳雖微也婦道克盡化芳寢疾晝夜侍湯藥瘁無人狀垂沒問所以自處曰吾無子女自處易易耳喪葬禮畢仰藥死年二十有一父役於歙縣汪士仁爲請當事聞諸

朝

予銀建坊入祀節孝祠且表其墓

張氏吉林六品軍功于占鼇妻占鼇沒將歛爲質語指其死謂所親曰吾生與爲夫妻豈可使獨死遂亦沒蓋仰藥久矣

劉氏籍吉林所居未詳繼賈人某室撫前妻子有恩居二年旣娠而賈病謂曰有錢二千貫媿而男也無論卽女亦與前兒均對曰好自養子男女事我亦不

能爲政也賈沒而產女送葬歸抱其女且泣且乳既而置女理妝仰藥以死

樂氏吉林居仁社劉銖妻生一女而銖沒時年二十有三舅姑語其父母曰既不幸而又貧也奈何乎兒則泣先父母對曰是有命幸無他言卽凍餓死不悔由是奉事益謹舅姑相繼沒喪葬儉而中禮嗣夫弟錄之子教之以母兼父姊姒若戚屬莫不賢而化焉蓋非僅以節著者

張氏吉林居仁社李汝斌妻年二十一汝斌沒無子親屬問所以守曰有猶子二又喪其母氏吾撫之幸而成立亡人兄弟各子其一此吾所以守他非所知也

盧氏知書有婦德故籍直隸撫甯縣旣僑吉林歸諸生馮應魁年二十八應魁與秋賦謂曰不幸親沒冀以科名顯揚然道路遼遠資斧非百金不可不能數辦必得之乃歸否者以兩兒爲卿累矣答曰行也君何憂旣再報罷留滯京師久之音問都絕產蕩於夫弟餽粥不繼稱貸姻族或謂之曰是可常乎且遊子去鄉久而無耗事殆可知何不自爲計盧氏大慟曰君不我助亦已矣是何言由是三旬九食俾子輟讀

而商各授室豕婦劉亦有賢行方年八十獻觴爲壽時兩子已前沒謂劉曰吾與若茹荼蘼有年今幸溫飽見孫與曾孫良足爲樂然念若翁甘心科名徇之逆旅則樂不勝其悲也又四年乃沒而應魁者羈魂不返殆猶望賜第如方干矣噫

安氏吉林永智社張卓妻年二十五卓沒有二子而苦貧或意無以守矣乃晝出薪樵夜歸紡績并日而食卒爲子納婦生孫或以節母頌焉曰始吾但以呱呱者不可棄而父於呱呱者不可忘何節之有然方二子未娶窮山破屋晝夜必挾與俱蓋有微旨也

紀氏字吉林誠信社郭同生幼穉也亡何同生沒父母將爲改字卽走郭氏白所以願留爲同生守舅姑哀而許之年始十三耳光緒三年旌

姜氏故籍山東甯海縣年十七歸吉林廳城

時未衣升府

尚志家初非裕佐以儉勤養舅姑則極豐腆旣寡教子衣雲甚至以貲官郎中同治五年廳城加修廓捐銀六千兩助工

封兩代三品母教也光緒八年姜氏年百歲有司聞於朝旌其門曰貞壽

任氏吉林居仁社人年十六許繼劉珍室未娶而珍

沒聞訃奔其喪撫前妻子襁負中以至成立甚有母儀光緒八年旌

劉氏年二十五殉夫姜汝富旌以光緒九年袁氏年二十三殉夫戴雲鶴旌以十二年張氏年三十一殉夫杜成旌以十五年並吉林居仁社人也噫同一里閨先後六載而煒然有烈婦者三社曰居仁信乎其仁矣悲夫

于氏吉林府人

光緒八年由廳升府

歸同里朱氏子娠而夫病

日夜祝生男既生女也而夫沒其女則前三日決夫不起斃之矣於是數仰藥救免舅姑澆其父母迎歸

開譬夫葬有日徧拜父母若兄弟行登車以去葬日辨色起侍其姑盥櫛畢反室更衣卒自絞也方在疾不數數哭泣蓋自斃所生女已以身與死盟故雖稽時日而百折不回如此未幾母家弟婦張氏亦以烈聞

張氏歸于九如數年九如病亟與之訣且勸自愛答曰孰謂君死而我乃獨生乎九如沒八日仰藥以死人初不知蓋懼如于烈婦爲救者所持也

馬氏吉林紅旗屯人歸同里楊維清年二十一而維清沒子曰芳林生始四月而翁姑並七十餘用十指

爲事畜子長娶婦生孫柏齡婦沒又撫孫至成立性好施予鄉里有急斥簪珥及衣濟之不惜卒年八十有四以曾孫貴封二品夫人而曾孫女或以貞或以孝與其節遙相輝映云楊貞女柏齡次女也字庠生林煥春年十七于歸有期煥春沒僵卧三日不食父兄譬喻甚至不答至許爲煥春守乃哭謝歸林營葬事家貧也翁姑老多疾夫兄癡而嫂瞽以勤儉相措柱兄遣子來省視睹其窮瘁至爲流涕以祖母命要之歸盡日輒返或強留焉則泣曰祖父子孫懼然自得奉事亦不乏人吾翁姑待我爲炊頃未知食否也

忍不返夫諸父悲而賢之以其孫嗣楊孝女則柏齡幼女歸郡人董貞一在室時母高病危及左手小指和藥以進遂瘥兄知以金爲之指且銘其上曰寸指寸金寸心旣適貞一三十而寡敬事翁姑門以內食指繁數於孝女無間言年今八十有奇五世同堂閻氏者柏齡之孫婦也初將來歸祖母病醫藥皆窮寡母幼弟計無所施則潛剖臂肉燂湯進之病良已歸楊日母與理衿襦乃得其故哭失聲志於節婦貞女若孝女例分編以仍世媲美類傳焉而閻氏亦附著蓋變例也又柏齡子誠一官直隸永年縣知縣則所

傳貞女孝女之兄也其孝女歸郡庠生于慕忱亦嘗
割臂愈母張疾以孝女稱云

蓋氏者居吉林涼水泉而金廣年之妻也廣年貧眇
一目所識牛春善治生未娶一日戲語廣年汝何修
而得美婦廣年心動曰若豔我婦予我百金我以婦
子若春曰善汝婦不從奈何曰姑言之則偕往廣年
先入謂曰相守貧死耳牛春許我百金聘汝爲妻汝
得所而我亦資以生孰與相守俱死蓋氏曰貧死命
也以貧而鬻其婦生何心矣噉然哭廣年出語春是
宜緩計俄而哭頓止入視已自縊於壁疾呼春共解

之春因摩弄其足甦以足抵春仆走厨中取刀自斫
其足立墜遂昏卧血泊中鄰里趨視唾廣年且將執
春春懼請奉百金者療之廣年亦自悔非人力營負
販育子姓甚繁而蓋氏之聲大著沒光緒十有八年
昔人傳列女有乞食逆旅逆旅主人牽其臂而自以
刀截之者以爲不可以一體汙一身其與蓋氏後先
同揆而貞心烈氣茶視冰霜矣

李氏籍吉林居仁社年十九歸同里秦繼宗事翁姑
以孝聞而繼宗善病數禱於神願減已算延之卒不
起翁姑知將以身殉哭謂之曰新婦死從亡兒則得

矣吾二人者焉託由是留事翁姑且以族子爲繼宗
嗣年今五十有五待旌其同社待旌者荆嶙之妻朱
氏嚴敏之妻秦氏楊潤之妻梁氏自外劉年之妻馮
氏李廣德之妻張氏林向青之妻鄭氏李泰之妻甯
氏甯克才之妻孫氏甯興文之妻子張日怙之妻
周氏戴廣龍之妻赫氏孫有兒之妻張氏大抵皆郡
人而郡人之社可詳者克勤社喬永順之妻張氏存
儉社胡興之妻馬氏其附郭則東關侯殿魁之妻牛
氏又農安縣農康社張鐸之妻沈氏農儉社裴悅寬
之妻李氏農和社曲學禮之妻常氏亦待旌

某氏伊通州尙禮社人歸同里劉芝紕於生事佐之
以勤六年而芝沒有子三齡家徒四壁立矣用十指
自活且俾其子列弟子員久之又沒無子爲擇族姓
嗣之嘗曰四十年未亡人何者不歷而仍奪吾子所
謂天者果有之耶年今七十有二而長春郭家屯劉
氏歸同里王某旋沒誓死以守族人曰不可使無後
也爲立嗣所嗣卽孝子王元賓之子也並待旌

席氏敦化縣人歸同邑靳繩祖年二十九繩祖沒教
二子使一耕一讀怡怡然也治家嚴整寡居數十年
雖親近罕見

傅氏歸敦化縣魏清清沒日茹荼蓼而舅姑之養無缺舅姑沒斂且葬教三孤皆有成論者曰是其心宜耗盡無點血矣

楊氏敦化縣孤景增妻年二十八景增沒作苦養姑及子姑沒竭力營殯葬子尋授室夫單門措拄恃一貧窶未亡人得不謂之難乎

袁氏長春懷惠鄉人歸王清山清山病將沒從兄清海來視私語之曰弟婦苦亦至矣僅一女而貧何以守弟死當令母女得善所毋多要索時已微聞欲哭慮傷病者心強忍焉憫仆於地既甦乃噉然曰我不

能以身與人易錢也清山沒旋葬訖早夜取舊衣爲女改製十數事一日清海偕戚屬至有所議議罷將語之已自縊於別舍時其鄉又有孫烈女

孫氏幼字李殿寵殿寵沒請奔喪母氏不可遂不食越三日母曰我老矣兒死我亦何用生爲乃強起踰年別爲議婚知不可止乃語鄰女曰我所以忍死冀終母天年今不復能待也沐浴理妝飲藥而縊李氏迎與殿寵合葬焉

張氏長春懷惠鄉人歸李彥亮年二十七彥亮病垂沒謂曰吾有兄與弟至事病母則在若矣泣許焉母

病十餘年不離牀第飲食一切雖有娣姒惟張氏之適於是悲纏心骨抑不自露而視聽於形聲之無夫兄若弟負博進無以償則斥奩具好謂之曰請償以此後勿博者可乎兄弟亦深自悔艾治生致小康門以內雍雍然也則尤彥亮沒時所望不到此者時同里劉氏亦以節著其言殊嚴雋可喜云

劉氏歸王瑞琳瑞琳沒年始二十一鄰婦以無出勸改適曰雖無子女不有翁姑爲新婦所當事乎且而故有夫夫亡勸改適而夫不而懼乎族人聽其言以子嗣之

徐氏居長春府懷惠鄉歸生員郭其昶生一女其昶病沒年二十有二舅姑知其性烈謂曰兒不難一死奈二老暨呱呱者與兒共命何由是抑而受教奉事備至舅姑相繼沒罄所有營葬女長里俗或贅婿爲嗣所親以爲言曰宗祧不可亂也卒嗣其昶從子霖鄉黨稱女宗或曰徐節婦云

張氏長春府沐德鄉人適王振翰振翰病且沒執手謂曰以年之少又無所庇以生死目不瞑矣泣對曰此無慮果不幸當與偕探枕畔所藏示之毒物也振翰瞑卽服以死光緒十三年